

يادي الجمال



يسرق ثواني من الفرح

ويدخلك مسجد حلال

يرتل قصائد للقلوب المتعلقة

بشوقها ف حبال

يادي الجمال.. يادي الجمال

لما العيون المتشوّقة

ترسم خيال

قمرية ساكنة في السما

ومفرقة

م الضيِّ ورد ببيتسم

على كل بال

يادي الجمال

ف القلب فكّ الشرنقة

وما عادش شئ اسمه المحال

لما الورق ع الفرع كان واقف حزين

الشمس كانت في الدفا حضن السنين

قطرة ندا زي ابتسامة مشقشقة

رقصة فراشة ف الهوا

غنّت غناوي الفرحانيين

رجع الخضار جنة هنا

فاتحة بيانها ع السما

يبقى الأمل ممدود

فارد بساط السفر

ف الكون مالهش حدود

يفرد جناح الحلم في الموال

ويطير زي النغم ع العود

فيقول:

يا سهرانين...

أدينا لسه بنبتسم

والضحكة بينا بتتقسم

وتبان على خدين

فالقلب صابر كام سنة

ما سرقش غير لحظة هنا